

BOSNA I HERCEGOVINA



**MEMORIJALNI CENTAR SREBRENICA-POTOČARI SPOMEN OBILJEŽJE
I MEZARJE ZA ŽRTVE GENOCIDA IZ 1995. GODINE**

**PRAVILNIK O DODJELI PRIZNANJA MEMORIJALNOG CENTRA
SREBRENICA-POTOČARI SPOMEN OBILJEŽJE I MEZARJE ZA ŽRTVE
GENOCIDA IZ 1995. GODINE ZA DOPRINOS DOKUMENTARNOM FILMU O
GENOCIDU U SREBRENICI –SrebrenicaDocs**

Srebrenica, juni 2026. godine

Na osnovu članova 7. stav (1) i 12. Zakona o Memorijalnom centru Srebrenica-Potočari Spomen obilježje i mezarje za žrtve genocida iz 1995. godine („Službeni glasnik BiH“ br. 49/07, 12/23 i 66/23) i članova 2. i 16. Statuta Memorijalnog centra Srebrenica-Potočari Spomen obilježje i mezarje za žrtve genocida iz 1995. godine („Službeni glasnik BiH“ br. 53/24 i 02/26), Upravni odbor Memorijalnog centra Srebrenica-Potočari Spomen obilježje i mezarje za žrtve genocida iz 1995. godine (u daljem tekstu: Upravni odbor), na svojoj 39. sjednici, održanoj dana 10.06.2026. godine, donio je

**PRAVILNIK O DODJELI PRIZNANJA MEMORIJALNOG CENTRA
SREBRENICA-POTOČARI SPOMEN OBILJEŽJE I MEZARJE ZA ŽRTVE
GENOCIDA IZ 1995. GODINE ZA DOPRINOS DOKUMENTARNOM FILMU O
GENOCIDU U SREBRENICI –SrebrenicaDocs**

I – OPĆI DIO

**Član 1.
(Predmet Pravilnika)**

Pravilnikom o dodjeli priznanja Memorijalnog centra Srebrenica-Potočari Spomen obilježje i mezarje za žrtve genocida iz 1995. godine za doprinos dokumentarnom filmu o genocidu u Srebrenici – SrebrenicaDocs (u daljem tekstu: Pravilnik) uređuju se uslovi, kriteriji te postupak nominacije i izbora dobitnika nenovčane nagrade „Priznanje za doprinos dokumentarnom filmu o genocidu u Srebrenici (za životno djelo)“ (u daljem tekstu: Priznanje), koja se dodjeljuje u okviru Programa dokumentarnog filma Memorijalnog centra Srebrenica-Potočari Spomen obilježje i mezarje za žrtve genocida iz 1995. godine – SrebrenicaDocs.

**Član 2.
(Svrha i cilj Priznanja)**

- (1) Svrha Priznanja je da afirmira borbu protiv negiranja genocida, traganje za istinom i pravdom, te postavljanje visokih standarda u dokumentarnom i igranom filmu o genocidu u Srebrenici.
- (2) Cilj ovog Priznanja je odavanje počasti istaknutim filmskim stvaraocima, rediteljima, producentima ili drugim filmskim radnicima čiji je dugogodišnji umjetnički i dokumentaristički rad ostavio neizbrisiv trag u dokumentovanju, očuvanju sjećanja i podizanju globalne svijesti o genocidu u Srebrenici.

**Član 3.
(Priroda i izgled Priznanja)**

- (1) Priznanje je isključivo počasnog karaktera i sastoji se od plakete/skulpture i zvaničnog priznanja koja se dodjeljuje u okviru Programa dokumentarnog filma Memorijalnog centra - SrebrenicaDocs.
- (2) Priznanje je stilizirano s natpisom „SrebrenicaDocs“, sadrži opis priznanja i godinu dodjele.
- (3) Priznanje iz stava (1) ovog člana čini isključivo fizička nagrada (plaketa/skulptura i zvanično priznanje), bez ikakvih novčanih ili drugih materijalnih beneficija.

II – USLOVI ZA NOMINACIJU, IZBOR I DODJELA PRIZNANJA

Član 4. (Opći uslovi za nominaciju)

- (1) Sva domaća i strana, fizička i pravna lica mogu nominovati naziv/ime i prezime lica za dodjelu Priznanja.
- (2) Predloženi kandidati moraju ispunjavati opšte uslove:
 1. Dugogodišnji doprinos – dokazan i kontinuiran rad u filmskoj industriji u trajanju od najmanje deset godina s posebnim osvrtom na teme vezane za rat u Bosni i Hercegovini, proces tranzicijske pravde, suočavanje sa prošlošću te specifično genocid u Srebrenici.
 2. Kvalitet i društveni uticaj – Filmski opus kandidata mora ukazivati na izuzetnu umjetničku vrijednost, historijsku tačnost i visoke etičke standarde, uz značajan društveni uticaj koji doprinosi edukaciji i kulturi sjećanja.

Član 5. (Postupak nominacije)

- (1) Nominacije mogu podnijeti filmske institucije/organizacije, fondacije/udruženja filmskih umjetnika/radnika, memorijalni centri, akademske institucije, kao i kredibilni pojedinci (filmski kritičari, historičari, novinari).
- (2) Samonominacije nisu dozvoljene.
- (3) Sve nominacije dostavljaju se isključivo putem zvaničnog elektronskog Upitnika za nominacije dostupnog na web stranici Memorijalnog centra Srebrenica-Potočari Spomen obilježje i mezarje za žrtve genocida iz 1995. godine (u daljem tekstu: Memorijalni centar) www.srebrenicamemorial.org.
- (4) U Upitniku iz stava (3) ovog člana je potrebno detaljno obrazložiti nominaciju kroz sljedeća obavezna polja:
 - Osnovni podaci: Podaci o nominatoru i nominiranom kandidatu.
 - Obrazloženje nominacije: Detaljan opis (do 1000 riječi) zašto kandidat zaslužuje Priznanje sa direktnim osvrtom na kriterije koji su opisani u članu 6. ovog Pravilnika.
 - Biografija i filmografija: Ažurirana biografija kandidata i kompletna filmografija s naglaskom na radove vezane za genocid u Srebrenici.
 - Dokazni materijali: Linkovi na relevantne filmove, recenzije, nagrade, priznanja i primjere društvenog uticaja.
 - Podrška nominaciji: Učitavanje najmanje dva pisma podrške od relevantnih institucija ili stručnjaka iz oblasti filma, historije ili ljudskih prava.
- (5) Nominacije za Priznanje prikupljaju se u periodu od 1. maja do 25. maja tekuće godine.
- (6) Nepotpune ili neblagovremene prijave neće biti razmatrane.

Član 6. (Kriteriji za ocjenjivanje)

- (1) Nominovani kandidati će biti ocijenjeni na osnovu sljedećih specifičnih kriterija:

Kriterij	Opis
Tematska posvećenost	Dosljednost u bavljenju temom genocida u Srebrenici, posljedicama rata i kulturom sjećanja kroz više filmskih projekata tokom karijere.
Umjetnička izvrsnost	Visok nivo filmskog jezika, inovativnost u pristupu naraciji, te prepoznatljiv autorski pečat koji podiže kvalitet dokumentarnog i/ili igranog filma.
Etički pristup	Poštovanje dostojanstva žrtava i preživjelih, izbjegavanje senzacionalizma i manipulacije, te strogo pridržavanje historijskih činjenica utvrđenih pred sudovima.
Globalni i regionalni odjek	Uspjeh filmova na relevantnim festivalima, priznanja struke, te utjecaj na širu javnost, akademsku zajednicu i procese tranzicijske pravde.
Edukativna vrijednost	Doprinos filmova u edukativnim procesima, borbi protiv revizionizma i negiranja genocida, te potencijal za korištenje u obrazovnim i memorijalnim institucijama.

Član 7.

(Prijedlog i imenovanje stručnog žirija)

- (1) Članovi Upravnog odbora dostavljaju prijedloge stručnjaka i drugih članova stručnog žirija.
- (2) Članove stručnog žirija iz Službe Memorijalnog centra može predložiti i direktor Službe.
- (3) Upravni odbor donosi Odluku o imenovanju stručnog žirija za izbor dobitnika Priznanja najkasnije do 01. aprila tekuće godine.

Član 8.

(Izbor dobitnika i dodjela Priznanja)

- (1) Nezavisni petočlani stručni žiri sastavljen od istaknutih profesionalaca, historičara i predstavnika Memorijalnog centra donosi Odluku o izboru dobitnika Priznanja najkasnije do 05. juna tekuće godine.
- (2) Protiv Odluke iz stava (1) ovog člana nije dopuštena žalba.
- (3) Dobitnik Priznanja se proglašava i istom se Priznanje dodjeljuje u terminu organizacije SrebrenicaDocs – Programa dokumentarnog filma Memorijalnog centra, u mjesecu junu tekuće godine.
- (4) Ukoliko nema kandidata koji u potpunosti ispunjavaju kriterije i uslove propisane ovim Pravilnikom, Memorijalni centar zadržava pravo da Priznanje ne dodijeli.

III – ZAVRŠNE ODREDBE

Član 9.

(Stupanje na snagu)

- (1) Ovaj Pravilnik stupa na snagu danom donošenja i objavljuje se na službenoj web stranici Memorijalnog centra.
- (2) Izmjene i dopune ovog Pravilnika vrše se kao i u postupku njegovog donošenja.



Predsjedavajući Upravnog odbora

Hamdija Fejzić

Broj: 01-02-3-1257/26
Srebrenica, 10.06.2026. godine